

**UMNO: Najib Tinjau Perhimpunan Agung Tiga Sayap Umno  
Bernama  
28 November, 2012**

KUALA LUMPUR, 28 Nov (Bernama) -- Perdana Menteri Datuk Seri Najib Tun Razak dan isteri Datin Seri Rosmah Mansor meluangkan masa kira-kira 45 minit untuk meninjau sendiri perjalanan sesi perbincangan Perhimpunan Agung Pergerakan Wanita, Pemuda dan Puteri yang berlangsung Rabu.

Sejurus tiba kira-kira 11.30 pagi, Najib dan isteri memasuki Dewan Merdeka, Pusat Dagangan Dunia Putra (PWTC) di mana kira-kira 1,000 anggota perwakilan Wanita sedang khusyuk mendengar hujah Ketua Wanita Umno Bahagian Pasir Mas, Rita Sarbanon Ismail.

Mengambil peluang kehadiran Najib yang juga Presiden Umno, Rita sebagai pembahas pertama dengan penuh semangat memaklumkan komitmen 230,000 jentera sayap parti itu dalam memastikan kemenangan terus berpihak kepada Umno dan Barisan Nasional (BN) pada pilihan raya akan datang, disambut tepukan gemuruh anggota perwakilan.

Sepuluh minit kemudian, Najib dan Rosmah bergerak ke Dewan Tun Dr Ismail, lokasi perhimpunan Pemuda yang ketika itu sedang mendengar ucapan ketuanya, Khairy Jamaluddin.

Menyedari kehadiran Najib, Khairy mengambil peluang mengucapkan terima kasih di atas usaha yang dilakukan untuk golongan muda sambil berharap momentum akan terus meningkat bagi mengukuhkan lagi sokongan orang muda kepada Umno.

Najib turut beramah mesra dengan bekas Perdana Menteri Tun Abdullah Ahmad Badawi yang hadir di dewan itu sebelum memasuki Dewan Tun Hussein Onn yang dipenuhi anggota perwakilan Puteri Umno.

Najib dan isteri kemudiannya meluangkan masa bertemu dan beramah mesra dengan warga Umno yang khusyuk mengikuti sesi perbincangan yang disiarkan menerusi televisyen di ruang legar utama PWTC dan di kawasan Galeri Umno.

Beliau secara santai sempat berbual dan bertanya sama ada mereka sudah bersedia untuk menyokong dan berjuang untuk parti, yang disambut teriakan penuh semangat "Bersedia!".

Selain itu, Najib dan Rosmah meninjau gerai-gerai jualan di Aras 3 sebelum meninggalkan PWTC.

Najib dijadual mempengerusikan mesyuarat Majlis Tertinggi khas Umno malam ini.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=712171>